

**Uunga siunnersuut: Sukisaarsaatigalugu aalisartunik aalisartitsinermut
akuersissuteqartarneq pillugu Inatsisartut inatsisaat nr. xx, xx 2012-meersoq
(Saqqummiussisoq Aalisarnermut, Piniarnermut Nunalerinermullu Naalakkersuisoq)**

pillugu

Aalisarnermut, Piniarnermut Nunalerinermullu ataatsimiititaliap isumaliutissiissutaa.

Siunnersuutip aappassaaneerneqarneranut saqqummiunneqartoq.

Aalisarnermut, Piniarnermut Nunalerinermullu ataatsimiititaliap suliarinninnerani ilaasortat uku ilaapput:

Inatsisartunut ilaasortaq Aqqaluaq B. Egede, Inuit Ataqtigiit, siulittaasoq

Inatsisartunut ilaasortaq Niels Thomsen, Demokraatit, siulittaasioq

Inatsisartunut ilaasortaq Juliane Henningsen, Inuit Ataqtigiit

Inatsisartunut ilaasortaq Hans Aronsen, Inuit Ataqtigiit

Inatsisartunut ilaasortaq Karl Lyberth, Siumut

Inatsisartunut ilaasortaq Hans Enoksen, Siumut

Inatsisartunut ilaasortaq Finn Karlsen, Siumut

UKA 2011-mi ulloq 13. oktober 2011 siullermeerereernerup kingorna Ataatsimiititaliap siunnersuut misissorpaa.

Siunnersuutip imaa aamma siunertaa

Inatsisissamut tunuliaqutaavoq akiliilluni aalisartitsinerup aningaasarsiornikkut pitsaaningortinneqarnissaanut nalunaarusiaq, Aalisarnermut, Piniarnermut Nunalerinermullu Naalakkersuisoqarfimmit pilersinneqartumit Pisuussutininik uumassusilinnik naleqarnerulersitsinissaq pillugu Suleqatigiissitamit marts 2009-mi tunniunneqartoq.

Suleqatigiissitaliaq Aalisarnermut, Piniarnermut Nunalerinermullu Naalakkersuisumit pilersinneqarpoq, tassanilu peqataapput Inuusutissarsiornermut Suliffeqarnermullu

Naalackersuisoqarfik, Kalaallit Nunaanni Takornariartitsinermut Inuussutissarsiornermullu Siunnersuisoqatigiit, Kalaallit Nunaanni Aalisarsinnaanermut Akuersissutinik Nakkutilliisoqarfik, KNAPK aamma KANUKOKA. Inuiaqatigiit eqalunmit pissarsiaasa pitsaanerpaanngortinneqarnissaannut periarfissat nalunaarusiami eqqartorneqarput.

Inatsisikkut eqqarsaataavoq piumasaqaatinik killissarititaasunik pilersitsinissaq, taamaaliornikkut Kalaallit Nunaanni sukisaarsaatigalugu aalisarnerup siunissami ineriartornera ikorfartorneqarsinnaalluni, kiisalu siunissaq ungasinnerusoq isigalugu takornariartitsisartut najukkamiittut sukisaarsaatigalugu aalisarnermik takornariartitsinerup iluani kaaviiartitsinermik suliffissaqartitsinermillu malunnaatilimmik pilersitsinissaannut alloriarnerussalluni siulleq.

Inatsisissatut siunnersuutikkut kuunni ikittuni toqqakkani sukisaarsaatigalugu aalisarnermut immikkut pitsaalluinnartumik neqerooruteqarneq periarfissaalissaaq, tamatumani nunanit allanit takornariat kikkut kuummut aalisariarsinnaanerat akuersissummik pigisaqartumit taamaallaat ataatsimit aqunneqassalluni. Taamaasillutik sukisaarsaatigalugu aalisartartut nunani allamiut immikkut pitsaalluinnartumik misigisaqarnissamut qulakkeerfigineqassallutik.

Innuttaasut Kalaallit Nunaanni najugaqavissut eqalunniartarnerat eqqarsaatigalugu inatsisissatut siunnersuutikkut saqqummiunneqartumit tamanna kalluarneqarnavianngilaq. Inuit kikkulluunniit Kalaallit Nunaanni najugaqartut manna tikillugu aalisarnermik killilersuinerit atuutereersut isiginiarlugit nunatta kuuini tamani aalisarsinnaapput.

Tusarniaaneq.

Inatsisissatut siunnersuut ulloq 19. november 2010-miit ulloq 20. januar 2011-imut tusarniagassanut attuumassuteqartunut tusarniaassutigineqarnikuuvoq.

April 2011-imi KANUKOKA aamma KNAPK kiisalu maj 2011-mi Nunatsinni Takornariaqartitsinermut Inuussutissarsiornermullu Siunnersuisoqatigiit peqatigalugit aamma malitseqartitsilluni ataatsimiittoqarpoq.

Siunnersuutip Ataatsimiititaliamit suliarineqarnera.

Ataatsimiititaliap maluginiarpaa inatsisissap siullermeerneqarnerani ataatsimut isigalugu inatsisissatut siunnersuut iluarisimaarneqartoq. Ataatsimiititaliattaq pissanganartutut isumaqarfigaa inatsisissatut siunnersuutikkut inuussutissarsiornermut periarfissamik nutaamik Kalaallit Nunaatalu takornarissanut nunani allaneersunut tikitassatut pilerisaarutigalugu nittarsaanneqarnerusinnaanera pillugu ammaassisoqassasoq.

Ataatsimiititaliaq paragraffinut ataasiakkaanut ima oqaaseqaatissaqarpoq.

§§ 1 aamma 2. Ataatsimiititaliami amerlanerussuteqartut (Inuit Ataqatigiinneersut aamma Demokratineersut) immikkut maluginiarpaat aalisarneq pillugu inatsimmut atuuttumut atatillugu kuummi imaluunniit imartami killilikkami pineqartuni nunaqavissut aalisarnermut maanna periarfissaat inatsisissatut siunnersuutikkut kalluarneqassanngitsut. Illuatungaatigulli inatsisissatut siunnersuutikkut inuit nunami namminermi aalisarsinnaanermut akuersissummik pissarsinikuusut kuunni imartanilu killilikkani akuersissuteqarfiusuni aalisarsinnaatitaanngillat, pineqartut tassaasinnaapput danskit innuttaasut Kalaallit Nunaanni aalajangersimasumik najugaqanngitsut, aamma inuit nunat allat naalagaaffiini innuttaasut ukiut siuliini marlunni Kalaallit Nunaanni aalajangersimasumik najugaqarsimanngitsut. Inatsit malittarisassanut atuuttunut naapertuuppoq, tassanilu qulakkeerneqarpoq nunamut immikkut attuumassuteqanngikkaanni pinngortitami isumalluutit piniarnikkut aalisarnernikkullu atorneqarsinnaanngitsut.

Ataatsimiititaliami ikinnerussuteqartut (Siumumeersut), isumaqarput qallunaat innuttaasullu nunani allamiut immikkut pineqarnerisigut paragraffini aalajangersakkat ammip qalipaataa tunngavigalugu immikkoortitserinermut attuumassuteqangajassinnaasut.

§4. Ataatsimiititaliap naatsorsuutigaa akuersissummik pigisaqartunut tamanut ataatsimut isigalugu piumasaqaataasut assigiissillugit akuersissutitut isumaqatigiissutit ilusilerneqassasut. Taamaattorli akuersissummut isumaqatigiissutit ima ilusilerneqartariaqarput, sumiiffinni ataasiakkaani pissutsit immikkut atuuttut isiginiarneqarsinnaallutik.

Kapitel 4. Kapitalimi aalajangersarneqarpoq kommuni sumiiffimmik sapinngisaaq malillugu najukkami inuttaasunit aalisarnermut atorneqarpiartanngitsummiittumik inassuteqannginnermini najukkami tusarniaasarnissamik kommuni pisussaasoq. Taamaalilluni Ataatsimiititaliaq isumaqarpoq sukisaarsaatigalugu aalisarnermik akuersissuteqartarnermut sumiiffiit piukkunnarnerpaat toqqarnissaannut sumiiffimmi periarfissanik pitsaasunik isumannaarisooqasasoq. Sumiiffimmi ilisimasaqarneq tunngavigalugu sumiiffimmi sukisaarsaatigalugu aalisartut qassiusinnaanersut aamma aalisakkat qanoq amerlatigisut pisarineqarsinnaanersut pillugit inassuteqaasiortoqartassaaq.

Aaqqissuussineq nutaajuvoq, taamaattumillu aaqqissuussinerup qanoq annertutigisumik atorneqarnissaanut misilittagaqartoqanngilaq. Tamanna tunngavigalugu inatsisissamut siunnersuummi § 13-imi akuersissutit amerlassusaannut taaneqartumut Ataatsimiititaliaq oqaasertaliussassaqaanngilaq.

Ataatsimiititaliaq isumaqarpoq tunniussinissamut piumasaqaatit § 18-mi taaneqartut

tunngavilersorluagaasut, tamatumani taaneqarluni qinnuteqartup takornarissanik sukisaarsaatigalugu aalisarnermik aqqissuussisarnermut siornatigut misilittagai, aamma aalisariartitsinermut atatillugu avatangiisinut tunngassuteqartut qinnuteqartumit qanoq iliuseqarfigineqassanersut, Ataatsimiititaliarmi isumaqarami aqqissuussinerup aallaqqaataanit iluatsilluarnissaa, ataatsimullu isigalugu takornariaqarnermik inuussutissarsiornermut iluaqutaasussamik nunarsuarmi sukisaarsaatigalugu aalisartartunit pitsaasumik tusaamaneqarnissaq pingaaruteqartorujussuusoq.

§ 20. Ataatsimiititaliami amerlanerussuteqartut (Inuit Ataqtigiinneersut aamma Demokratineersut) isumaqarput akuersissuteqarnerup sivisussusia ukiunut qulinut piffissaliinnermit sivikinnerusoq tulluurtuunngitsoq. Akuersissutinik piginnittuusunut ataasiakkaanut suliffeqarfimmik pilersitsinermut ingerlatsinermullu aningaasaliinissaq pisariaqarsinnaavoq. Nittarsaanermut pilersaarutitut aningaasartuutit, ilaasunik angallassinissamut angallammik akuersissutitalimmik pisinissamut immaqalu illuaqqanik unnuisarfinnik pilersitsinissamut aningaasartuutit pisariaqarsinnaapput. Taakku aningaasartuutit tamaasa eqqarsaatigalugit Ataatsimiititaliaq isumaqarpoq ukiunit qulinit sivikinnerusumi akuersissummik pigisaqarnissaq tulluurtuunngitsoq. Ataatsimiititaliami ikinnerussuteqartut (Siumumeersut) isumaqarput akuersissuteqartarnermut piffissaliisarneq sivisunerpaamik ukiunut tallimanut aalajangerneqassasoq, suliffeqarfiit piffissamut ungasinnerusumut pilersaarusiortanngimmata.

Ataatsimiititaliaq isumaqarpoq piffissap akuersissuteqarfiusup qaangiunnerani akuersissummik pigisaqartup akuersissut toqqaannartumik ingerlaannaq pissarsiareqqissinnaasariaqanngikkaa. Piffissap qaangiunnerani qinnuteqartut arlaqarpata, taakku immikkut nalilerneqassapput, naleqqunnerpaarluni akuersissummik tunineqarluni. Akuersissummik pigisaqartoq piffissami naammaginatut ingerlatsisimappat tamanna soorunami taakkua nalilerneqarneranni ilaatinneqarsinnaapput.

§ 21. Ataatsimiititaliaq isumaqarpoq amerlanerpaamik akuersissutinik marlunnik tunniussisinnaaneq pillugu aalajangersagaq aallaaviusoq pitsaasoq. Piffissaq ungasinnerusoq eqqarsaatigalugu Ataatsimiititaliaq isumaqarpoq tutsuiginartumik akuersissummik qinnuteqartut qassiunerat, kuuit imartallu killilikkat toqqarneqartut qanoq siamasitsiginerat, kiisalu akuersissutinut ataasiakkaanut aningaasartuutit tamatumani naammattumik nittarsaanermut pilersaarutitut aningaasartuutit qanoq annertutiginerat maluginiarneqalerpata apeqqut tamanna qaqeqqinneqartariaqartoq.

§ 22. Ataatsimiititaliap inummut ataatsimut ullormut 150 kr.-nik akiliisitsisarnissamut siunnersuut isunimersorfigaa, kiisalu amerlanerussuteqartut (Inuit Ataqtigiinneersut aamma Demokratineersut) inatsisissatut siunnersuummi nassuiaatini taaneqartut aallaavigalugit taakku tunngaviatigut naammaginatut isumaqarfigalugit. Amerlanerussuteqartut

isumaqarput akiliut annertusineqarpallaassanngitsoq, taamaalilluni suliffeqarfinnik isumatusaartumik pilersitsiniarnerit akuersissummik qinnuteqartunit tunuarsimaarfigineqassanngimmata.

Ataatsimiititaliami ikinnerussuteqartut (Siumumeersut) isumaqarput, sukisaarsaatigalugu aalisarnermut akiliut inummut ataatsimut ullormut 450 kr.-nik annertussusilerlugu aalajangerneqassasoq.

Ataatsimiititaliaq isumaqarpoq, Kuunni imartanilu killilikani ataasiakkaani sukisaarsaatigalugu aalisartartut akiliisartut qassiunerat paasineqarpat akiliut nalileqqinneqartariaqartoq. Siunissamittaaq aalisarnerup suli pilerinarnerusunngortinnissaa siunertaralugu aalisakkat piaraannik avalatsitsisarnissamut immaqa immikkut akiliuteqartitsisarneq eqqarsaataalersinnaavoq. Taamaattorli tamatumunnga atatillugu Ataatsimiititaliap naatsorsuutigaa aaqqissuussinikkut aalisakkat ikittuinnaat pisarineqartassasut, sukisaarsaatigalugumi aalisartut amerlasuut aalisakkat avalatseqqittarnissaat toqqartassagamikku.

§ 23. Ataatsimiititaliami amerlanerussuteqartut (Inuit Ataqatigiinneersut aamma Demokratineersut) isumaqarput akuersissut qaqutiguinnaq atorneqartarpat arsaarinnissutaasinnaanera tulluurtuusoq. Akuersissut annikitsuinnarmik atorneqartarpat tamanna akuersissummik pigisaqartup aallussilluannginneranik pissuteqarsinnaavoq imaluunniit aalisarfiusup pilerinannginneruneranik. Ataatsimiititaliaq isumaqarpoq akuersissutip akuersissuteqartumit allamit sunniuteqarluartumik immaqa sumiiffimmi allami atuisinnaaneranut pissutsit tamakku mattussisariaqanngitsut.

Ikinnerussuteqartut (Siumumeersut) aalajangersagaq naammaginngitsutut isumaqarfigaat, kuuit ilaanni tamatuma maleruarneqarnissaa ajornakusoorsinnaammat.

Avatangiisinut pinngortitamullu sunniutaasut

Akuersissummik tunniussineq kuummik piujuartitsineq tunngavigalugu atuineranut piunasaqarnermik nassataqarpoq, aamma akuersissummut isumaqatigiissutip avatangiisitigut piunasaqaatitaani sumiiffimmi kuup eqqaani eqqiluititsinissamik sukujoqartitsinnginnissamillu piunasaqartoqarluni. Aaqqissuussinermi isumat pingaaruteqartut ilagaat takornarissat pinngortitamik innarlerneqarsimanngitsumik kusanartumillu takutinnissaat.

Siunnersuutip aningaasatigut sunniutissai


Ataatsimiititaliaq isumaqarpoq aaqqissuussinernut nunamut iluaqutaasussatut kinguneqartussatut naatsorsuutigineqartunut aningaasartuutit inatsisissatut siunnersuummi taaneqartut isertitassanut ussasaarinernillu suliniutissanut sanilliukkaanni tulluurtuusut.


Ataatsimiititaliap inassutai.

Ataatsimiititaliaq isumaqatigiitooq inatsisissatut siunnersuutip saqqummiunneqartup Inatsisartunit aappassaaneerpeqarnerani akuerineqassasoq **inassuteqarpoq.**

Taamaattorli Ataatsimiititaliami ikinnerussuteqartut Siumumit sinniisut peqatigitillugu **kaammattuipput**, Naalakkersuisut pingajusaaneerinninnermi allannguutissatut siunnersuummik saqqummiussissasut, taamaalilluni § 20-mi akuersissuteqartarnerup sivilissusaa ukiunit quliniit ukiunut tallimanut allanngortinneqarluni, aamma § 22, imm. 1-imi inummut ataatsimut ullormut akiliutigineqartartoq 150 kr.-niit 450 kr.-nut allanngortinneqarluni.


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.


Aqqaaluaq B. Egede
Siulittaasoq



Niels Thomsen
Siulittaasup tullia


Hans Aronsen


Juliane Henningsen


Karl Lyberth


Finn Karlsen


Hans Enoksen